

痛史

第二
玉
二十
册
函

序

讀史而嘗嘆古人勲業。其彪焯不朽者。非獨人之有異才特遇以其時耳。世咸推韓范以文臣而諳武略。胸羅甲兵。手捧天日。爲能屹奠巖疆。銘功彝鼎。然在韓范之時。亦易易也。若乃國步多艱。勢成板蕩。豈乏毅幹不二心之臣。枕戈飲血。力圖定傾。而絀於事權。肘左右掣而不得舒。徒以身瘁。此其人之不幸。而實宗社之不幸也。亦孰非天爲之哉。中丞玄若高公。經緯學貫。傑然憲邦之才。而嚴氣正性。尤世所莫及。筮仕由刑曹出。恤楚獄。多平反。尋剖虎符。守荊州。褰帷風清。興利除害。庶政釐舉。戢宗藩之暴橫。厚民拊翼。人咸愛戴之。時流寇從晉豫渡河。屢逼荊城。公聚櫓簡稽。整修防禦。使賊不敢近。已諗公壯猷克詰矣。嗣以副憲涖湖南。備兵長沙。楚郡在江北者。盡罹寇殘躪。而臨藍衡湘間。羣盜蜂起。公拮据戎務。於十二屬邑之城堡。預加繕治。慮額兵單弱。捐俸召募。練習鄉勇。沿江一帶。上自都石。下至磊石。增造水艦。演熟哨法。賊果由衡山突攻湘潭。以有備。水陸齊發。俘斬無算。大創而去。遂得提兵同沅臺。

合剿臨藍。大小十餘戰。踢伏擣虛。皆以全勝居上功。此守長成效也。晉臬長。移治下荆南。駐鄖陽。則闖獻二賊。逆燄益熾矣。鄖屬六邑。俱沒蓬蒿。青燐遍野。獨鄖城彈丸六里。墮壘僅存。甫蒞任。獻賊忽自東來。公堅壁固守。賊知戒嚴。因引而西。鄖幸無恙。未踰年。李賊據有荆襄。承德諸郡。從陷均州後。悉力來攻。先後薄鄖城者五。公身冒矢石。鼓率將士。倚轅而令。常以少擊衆。出奇制勝。賊始畏鄖兵。相戒無犯。嘗列營楊溪。賊有聞漢江水石相擊聲。夜大呼爲鄖兵至。相殺奔竄者。而鄖乃獲存。公因乘勝移師恢均州。是守麋功績。較守長有加倍者。夫流氛之肆毒全楚也。以洞庭湘江之險。曾不聞扼要而禦。版圖遼闊。鞭長不及。凡議進剿。鎮必會商於撫。撫必請命于督。爲可卸罪地。而兵東則賊西。兵西則賊東。以致軍機坐失。動遭敗衄。若畫地分界而守。得盡如公。以一道臣而殫心戮力。先事綢繆。兵不踰數千。敵賊百萬。在長則長全。在鄖則鄖全。江漢咸倚公爲固。賊雖狡勁。亦何難撲滅。且當日總閣部。建大牙者。每皆書生白面。不諳兵略之人。一有僨轅。輒加逮繫。屢易以新。人無恃志。如公蒞楚。凡

十五年。其于湖南北七道。山川要害。形勝所區。無不洞曉。而且挾纊投醪。威信素著。將士懾服。使之開府江夏。相機掃蕩。合全楚之力。以扼賊吭背。賊必不能西襲全秦。長驅入北。天下事盡可爲也。憶辛巳。賊以八騎假督師符。誘破襄陽。親藩遇害。舉朝震動。余侍從經筵。先帝于進講畢。言及楚事。憫念赤子塗炭。泫然揮涕。因拊髀而嘆。諭大臣亟簡在事歷練知兵者。刻期迅勦。乃有頗牧如公。而不能用。良可悼也。公志扶社稷。于狂氛遍斥中。獨保危城。嚼紙煮鎧。絕乏救援。上疏痛陳時變。并乞師。隔歲而始得達。在揆路尙有阻撓之者。數千里外。孤臣淚洒。有衷莫訴。言之令人嗚咽。比甲申二月。遷公中丞。撫秦漢興軍。而秦地久陷。已無及矣。哭讀嚙血遺詔。公誓不與賊俱生。雖已謝郾。而值賊攻郾。挺身登陣。志不少懈。欲爲南都一圖恢復。而勢竟莫挽。不得已。退耕沔洲。自甘埋遯。比年歸里。同余栖遲林壑間。每談及楚昔情狀。輒撫膺太息。以有願未展爲憾。公功足媲韓范。而勿殫厥成。惟天實爲之。讀公守郾紀略。憑弔往事。亦大堪悲已。光溪逸史確菴葛世振拜題。

守鄖紀略

蠶甕居士高斗樞象先氏著



崇禎丙子。予以湖廣副臬。備兵長沙。庚辰。晉右參政。辛巳六月。聞報。晉臬長。移守下荆南。駐鄖陽。故流賊出沒。已十年矣。先是庚辰。閣部楊公既敗張獻忠。獲其妻妾。及軍師潘獨鰲。不卽殺。而置之襄陽獄中。獻賊入蜀。李自成羅汝才及老獍革里眼。諸賊繼之。蜀撫邵公捷春。力不能拒。致被逮。閣部統諸部兵。追至蜀中。戰守逾年。賊勢愈熾。至辛巳正月。賊復奔楚。閣部迎戰於楚蜀之交。兵大潰。獻賊遂從巴歸。問道馳至襄。襄有防守兵數百。賊啖以利。反爲賊用。二月初三日半夜。城中四面火起。官民俱不知所繇。已而道臣張君克儉及郡邑各官俱被殺。襄王亦遇害。皆防守官兵所爲也。至次早天明。獻賊至。各兵迎之以入。遂取其妻妾及潘獨鰲以去。報聞。天子大怒。爲逮撫臣袁公繼咸。然袁公先奉閣部檄駐竹山。去襄千里實。非其咎。鄖道萬

君言策亦被黜。於是右參政王公永祚晉鄖撫。予遷鄖道。而襄道則調參議冒君起宗云。

予以七月初。於長沙解纜至荆。而臥疾數日。月盡達襄陽。城中一片焦土。向來塵市。止存頽垣敗壁。居民十無二三。皆葺草以居。官署僅有新葺者。徘徊入鄖。則八月初六。鄖城四圍僅六里。又半爲甌脫。居民不滿四千。外六屬俱爲賊破。每年蹂躪四五次。惟郡城獨全。然城外關廂俱燬。無一居民。田疇俱爲蓬蒿者。數百里如一。惟近城之田。則城中人耕種以糊口。是年蝗飛蔽天。野無寸草。七月間。獻賊復繇鄖入秦。督師丁公與左鎮尾之而至。左兵二三萬。一湧入城。城中無一家無兵者。淫汙之狀。不可言。數日啓行。復罄洗其家以去。去十許日。而予至。米糲俱無可覓。士民相見。無不痛哭流涕。不恨賊而恨兵。眞慘極矣。大約自荆至襄。所經荆門宜城。城邑無恙。而村落已空。然猶有十一二僅存者。自襄至鄖。則城邑已不堪言。而出城竟不見一人。村落止存廢址。欲覓一椽一瓦。俱不可得矣。若鄖之六屬。房縣竹山竹谿上津鄖西保

康并城郭俱已平夷。城址俱一片蓬蒿。居民僅存者。俱覓山之高而上有平崗者。結砦以居。大縣可三十砦。小縣不過十餘砦。砦之大者。可二百人。小者不滿百人。各墾砦下之田以自給。縣令至者。亦居砦上。征輸久停。民貧無訟。胥役盡逃。令與民大率並耕而食。不復能至郡參謁矣。

予以初八日履任。至十三日。忽接猛將軍如虎檄。報獻賊復東來。立可至鄖。是時鄖兵俱發往各路。蓋因賊既西入秦。倘秦兵嚴守。必折而從北也。不意仍從西來。須臾猛將軍至。兵僅百許。次早獻賊至。予率塙夫登陣固守。賊亦不知城內無兵。而又慮督師在後。竟引而東。而城中士民復大恐。謂左兵當復經此也。予卽遣役往迎督師。且懇其兵無入城。督師答書。已許不入城。而託予於城外覓數間小房。欲暫住以發疏。予先以督師書傳示士民。人心始定。明日督師至。駐一關帝廟。湫隘殊甚。又十日始東。左鎮意殊不懌。以沮其入城也。猛將軍係外國降將。驍勇善鬪。是冬戰死於南陽城上。

鄖城舊爲治院所駐。是時澄川王公移鎮襄陽。而鄖中共事者。守徐君起元。倅陳君萬家。李則朱君翊辯也。營將則房竹營游擊李茂春。兵一千五百。均陽營游擊胡廷聘。兵五百守均。其留鄖者一千。而治標左營百總楊明起。余啓凡。各兵三百許人。又游擊王光恩。兵可三百許。則降丁也。余因周視鄖地。東與北俱山麓。而西與南俱漢江。賊善騎而不習舟楫。余謂戰地必在東與北。離城僅丈許。行半里。遇一小山名西壇。遂折而西。繞西壇之外。復折而南。沿至東南城下。離城亦止丈許。予乃於西北及東南兩隘。各繕一樓。一面倚城。一面倚漢水。各甃以磚。樓上多設銃礮。樓下開一門。以通出入。李茂春之兵。卽營於東南樓之內。沿南城外而居。西壇高出於城丈許。不可無兵。而山頂頗平。量可容兵數百名。則令楊明起居焉。西壇之下。地平如掌。當城之西南。則王光恩居焉。城東亦有二培塿。一曰四鋪嘴。一曰青龍寺。離城甚逼。予令余啓凡居四鋪嘴。分均陽營兵二百名。居青龍寺。其均陽餘兵。則居城中。備城上及他調發之用。均陽兵皆鄖城人。與鄖民俱親族。在各營中獨守法。故留之城中。其城

北素無濠。城東雖有濠而淺。地勢陡峻。不能蓄水。余令東北離城丈許。各築土牆。高八尺。每堵留一銃眼。凡閱三月。而四城防守之事俱備。其一切築牆造樓。及葺蓋兵房。皆用各營兵。而不煩一民云。

辛巳之冬。壬午之春。郾城幸無賊警。夏間忽接陝西興安道檄。稱川北有賊名搖天動。先時同羣賊入蜀。厥後各賊東來。而此賊獨留川北。今將從興安趨竹山。以及郾襄。約有萬餘。予令房竹營千總漆尙友。均陽營千總高萬錦。并楊明起。合兵禦之。賊聞竹山有備。遷延不敢入境。仍歸川北。至九月間。王光恩來云。有弟光興在搖天動內。有衆數百。情甘投順。余未之許。而光恩請愈懇。余令光恩招之至。汰其老弱。得精壯百五十人。卽隸光恩營。光興改名光泰。後李賊犯郾。光泰戰甚力。

先是張李各賊。每陷一城。輒大掠以去。至壬午夏秋。李白成羅汝才每得一城。輒分賊防守。且嚴禁搶掠。以籠絡民心。時已得中州數郡。將取襄郾。而左大將軍自開封潰後。久住樊城。全無赴賊之志。治臺王公澄川。亦留左於樊。以衛襄。謂大兵在。賊必

不至也。及自成汝才繇汝寧趨襄。左聞風先遁。至荊州。又念荆以江爲界。無路可逸。又改往武昌。而賊遂長驅抵樊。徘徊數日。以大礮擊襄之北城。襄人大恐。一時文武先取其家屬登舟矣。賊復西去七十里。至白馬灘渡江。王公澄川竟護福清王東下。賊遂入襄。時十二月初三日也。初八。賊分股攻均州。時降丁惠登相在焉。登相隸左大將軍。而分居於均。素狂悍難馴。不屬鄖鎮節制。至是斂兵登武當。依險自完。賊遂入均。守將高萬錦自溺漢江以死。十二日。賊抵鄖城。予率各營戰於城外。時王光恩光泰楊明起余啟凡。戰甚力。賊攻四鋪嘴青龍寺。晝夜不休。啟凡等以火礮擲之。焚死者相踵。而攻不止。然終不能登。賊又分股直抵北城。予于土牆內。先伏鳥鎗手擊之。百發百中。賊不能近。至十五日。賊始退。是月荊州承天。相繼俱陷。

方賊繇白馬灘渡江。鄖襄路斷。故鄖中久不知襄已陷也。至攻鄖而退。兵追之。獲賊三十餘人。始言襄陽情形。李茂春素恆怯。始有懼色。且謂治院已東去。鄖兵月餉將安出。而惠登相在武當。貽書勸其遠避。否則賊再來。必不能支。茂春遂於十七日夜。

拔營西去。予親往留之。竟不能得。次日。茂春將往金漆潦。會參將徐勇。先奉治臺檄守灘。茂春不能過。而營內船少。各兵多步行。兵婦無不嗟怨。又四鄉無一居民。兵無所得食。於是茂春大窘。復統其兵來歸。予下令各營。謂茂春罪在不赦。而裨將及各兵。則不妨招之入營。茂春必須擒獲議罪。於是王光恩。楊明起。余啓凡。各招房竹營兵。兵盡降。而茂春就擒。余縛送徐參將。令其羈於營內。以候請旨。後勇亦去金漆潦。至興安。茂春隨之以去。又數月。茂春病死。光恩等三人。既分招房竹營兵。又各有召募。三營之兵各盈千。而高萬錦死後。其兵亦歸鄖。仍入均陽營。於是鄖兵有四千餘云。

癸未春。李自成與羅汝才

節曹操

同駐襄陽。時已據襄荊承德。并汝寧南陽河南及開

封諸郡矣。自成志圖僭立。欲先吞并各賊。時獻賊在安廬黃州一帶。自成每與書檄。皆用上司臨屬吏體。獻賊大怒。然畏自成之強。不敢與較。亦不敢復與自成合營矣。老獬狴革里眼各股。自成以計除其魁帥。并將其衆。惟汝才勢力相敵。自成潛欲除

之。忽於三月初六夜。自統精賊百餘。直至其營。排闥而入。斬汝才於臥榻之上。汝才部下。初多不服。自成百計籠絡。半月始定。於是中原爲難。一憑自成所爲矣。

惠登相在武當。自成屢招之。登相見其誅鋤同輩。懼而不往。自成大怒。令賊劉某統兵三萬往擒登相。隨攻鄖城。登相聞之。逃往興安。賊追之不及。遂於白河一帶劫往來之船。欲從漢江順流犯鄖。予念鄖城外西南。爲各營所居。獨倚漢江爲險。若賊得順流而來。各營何以自固。又計自興安至鄖。船數不多。因急令水哨馬之服。領兵船十餘。溯流而上。驅捍民船。將至白河。賊已得船五隻。然船戶已先逃。賊在船中。不能自駕。之服擒船一。賊十二人。其四船皆走。覆水者二。登岸而逃者二。之服并獲其四空船以歸。賊仍從陸路。於均州渡漢而北。竟薄鄖城。時鄖兵止四千有餘。又益以衛軍三百。及民間丁壯二千。以青衿能事者領之。盡出城搏戰。城上僅留老弱守堞。及均陽營兵二百主礮而已。賊勢甚勇。先用均州靜樂宮內門扇。約百餘片。列於東北城。以繩網縛。如木城。我兵直抵其營。連用火礮擊之。火起。賊走。各兵盡撤其木城以

入。次日。賊用木梯六十餘條。復抵城下。各營齊出奮擊。殺賊數百。盡奪其梯。賊始退。而營於楊溪鋪。離城十里。予因與各將約曰。賊衆五倍於我。且有馬賊二千餘。我兵出戰。不可遠追。倘賊用馬繞我兵後。則城與兵不能相顧矣。今後兵出城。以一里爲止。又兵與賊相持。倘賊不能遽退。則城上擊大鑼三聲爲號。兵卽兩邊疾驅。以開銃路。城上大小銃三百。一齊俱發。則賊未有不傷者。如又不退。而近土牆。則牆內鳥鎗齊發。又佐以城上之礮。必無能爲也。自三月杪至四月初。賊傷死甚衆。忽一夜。城上哨者見二十餘丈外。賊暗中往來。徹夜不休。不審其所爲。至曉視之。則已築臺十許座矣。其臺用土一層。卽用麥一層平鋪之。層累而上。高與城等。每臺長二丈。闊丈餘。仍用磚石砌垛其上。架銃擊城。凡三夜。成臺三十六座。亘於城之東北二面矣。又十餘日。予料臺上之賊。久而必倦。約各營及民兵盡出攻臺。民之老弱者。盡攜鋤鉞以隨。攻破一臺。輒鋤平之。并攜其麥以歸。自晨至午。已鋤廿二臺。予料各兵饑倦。卽令歸營。次日休息。又次日復出兵。盡鋤其臺。賊大窘。復退至楊溪鋪。然尙無去志也。先

是治臺標下遊擊劉調元。當襄陽陷時。統衆入山。素欲歸鄖。而苦鄖無糧。至是予遣人邀調元。統其所部六百人來鄖。賊聞之。輒分賊渡漢。邀擊調元。予亦發兵千許往援。賊大敗。調元始得至鄖。時五月初一也。予以調元遠來。應休息一日。初三黎明。當盡發城內外官民各兵。往楊溪撲賊。至初二午。遙見賊營火起。如欲遁狀。而大雨適至。復不果去。初三日。予起發兵。則賊已遁矣。賊之攻鄖。先後凡四次。而最勇者惟此。官民各兵。無不捐軀自效者。當四月初。予遣一健兵往陝西。請援於督師孫公。且言旬日以來。殺賊三千。孫公笑曰。爾鄖殺賊已盈萬。而止報三千。何也。去兵不能應。孫公復曰。昨有賊來降。自言攻鄖不破。已死一萬兵。應曰。方兵與賊戰時。見一賊倒地。卽紀一功。故云三千。至賊傷於陣上。回營而死者。鄖中亦不能知。故賊云滿萬也。孫公首肯之。隨發中軍高傑。統兵援鄖。傑未至而賊已退。鄖之將士。自此知賊可禦。城可守。人人自奮。無離心矣。而治標降丁苗時化。亦在南漳。因統衆來歸。時化驍勇善鬪。鄖兵勢稍振矣。

五月杪。自成聞督師治兵西安。將出關而南。遂至鄧州。忿鄧之堅守。復發兵來攻。予戒嚴以待。數日。賊抵龍門。離鄧八十里。頓而不進。衆不解其故。予曰。此必畏而不來。又迫於自成之命。不敢歸也。今當每日黎明。發兵五百。營於楊溪山上。日入而歸。次日復然。又戒之曰。倘賊悉衆而來。爾卽歸鄧。不可輕戰。如是三日而賊遁。後問彼地居民曰。賊甚畏鄧。不敢前。見楊溪山上有兵。卽欲遠去。會五更時。漢江水發。有水石相擊聲。賊於夢中大呼曰。鄧兵至矣。遂大亂相殺。或奔或伏。至天明。賊將曰。未見鄧兵。已作此狀。奈何欲攻鄧乎。遂引去。

均州去鄧僅一百二十里。爲賊所據。鄧兵哨探。不能踰均而東。六月間。予令王光恩苗時化劉調元往攻之。賊聞兵至。輒遁。遂復均州。

督師孫公駐西安。將出關討賊。自成駐鄧州以待之。予請於孫公。謂大兵出關。自成必悉衆迎戰。請以鄧兵直趨光化穀城。以搗襄陽。乞密示兵期。孫公約以八月上旬。至七月杪。惠登相徐勇。繇興安直趨均州。奉孫公檄。會鄧兵同攻光穀。予謂督師兵

未出關。而自成在鄧。離鄖止三百里。鄖兵不宜遠出。且姑待之。登相不聽。與徐勇徑趨穀城。予不得已。先令劉調元苗時化往。俟自成離鄧。再發兵。八月初。惠徐劉苗竟抵穀城之下。賊不料官兵猝至。倉皇無措。然登相不攜攻城之具。賊欲走而兵已傅城。賊不敢出。城上寂無一人。而兵亦束手不能登。至次日。登相等始得木梯鋤鈚等具。而城上塏夫及銃礮矢石。排列亦定矣。又數日。襄陽發賊來援。登相與時化迎擊之。斬首數百。生擒一百四十餘人。餘賊奔回。然穀城竟堅守不下。調元爲登相所侵侮。遂渡漢水而北。獨抵光化。書諭守賊傅某。遂以城降。至九月初十。聞督師已出關。自成亦離鄧。予乃發王光泰楊明起。又分均陽營兵。親統往穀。穀堅守如故。予謂必得內應乃可。又旬日而僞知縣陳知密請降。約以次早。兵從西南角登城。城遂破。各賊或斬或奔。城內居民。先爲獻賊所屠。不滿二百人。登相復肆擄掠。余力禁乃止。又次日而督師敗報至。

督師出關。自成率賊於襄城郟縣之間待之。由陝至郟。凡郡邑城俱不置守具。督師

至一城輒入。迨至襄郟間。去關已遠。糧運頗艱。而自成堅守不戰。分賊萬餘。繞出督師之後。餉道遂絕。督師大驚。總兵白廣恩先降於賊。餘兵遂潰云。

督師敗報至。穀城諸將皆色沮。而登相徐勇更甚。予亦未審自成行止。未便攻襄。而穀離郟遠。遂旋師入均。以探自成消息。又一月。知自成入關。且至西安。又遣賊來襄。盡護其妻妾以北。予始統各營攻襄。登相與勇竟不行。襄賊爲李之綱路應標楊捷等。聞兵至。開門出戰。苗時化王光恩奮擊大破之。斬賊二百餘。賊奔入城。城既高。而北面臨漢江。東西南三面皆濠。深廣難渡。賊又恐郟兵順流而下。乃於漢江當城之西北處。以大船填巨石。沉於江底。自南至北。橫截江流。予令各營於三更時。多負小舟。至東南一帶。渡濠薄城。而城外亦有短牆。牆時連時斷。賊初藏於牆內。見有小舟間渡。齊出牆外。銃箭齊發。舟不能近。予誘賊出戰。而賊終不出。予欲坐困之。而郟守徐郢理朱。各以牘來。稱自成已破西安。徇地至漢中。并商雒一帶。俱爲賊有。賊已近郟。而兵乃遠出。乞加詳審。予然其言。遂於臘月望日。收兵歸郟。而勇與登相。遂各率